



*Du mauuais riche ; & du Lazare , qui mourut de pauvreté à sa porte , l'ame duquel fut receüe au sein d' Abraham.*

**A**FIN que nous ne reputions mal-heureux deuant Dieu ceux que nous voyons languir en ce monde , Iesus propose ce qui ensuit. Il y auoit vn homme riche , vestu de pourpre & de soye , qui se traitoit fort delicatement ; & d'autre part vn pauvre nommé Lazare , gisant à sa porte , qui estoit plein d'vlcères , lequel desiroit estre rassasié des miettes qui cheoient de la table du riche , & personne ne luy en donnoit ; mais les chiens luy leschoient ses playes. Or aduint que le pauvre mourut , & fut porté des Anges au sein d'Abraham ; ce riche aussi mourut , & fut enseuely en enfer , & esleuant ses yeux quand il estoit tourmenté , il vid de loin Abraham , & le Lazare au sein d'iceluy ; & s'écriant dist , Pere Abraham , aye pitié de moy , & enuoye le Lazare , afin qu'il mouille le bout de son doigt en l'eau , & qu'il rafraichisse ma langue , car ie suis tourmenté en cette flamme : & Abraham luy dist , Fils , souuiens-toy que tu as receu des biens en ta vie , & le Lazare n'a eu que des maux ; maintenant il est consolé , & tu es tourmenté ; aussi tu vois que l'abysme qui est entre toy & nous , empesche de passer. Ce miserable pria Abraham que ses cinq freres fussent aduertis de son tourment , afin qu'ils ne tombassent en mesme peine que luy ; mais Abraham luy dist , Ils ont Moyse & les Prophetes , qu'ils les oyent.